

欽定剿平粵匪方略

欽定勦平粵匪方略卷三十六 癸丑年

四月二十三日

丁酉

琦善陳金綬勝保奏言查揚

城逆賊占踞月餘計在死守誘戰不出十六日

晚閒臣琦善派總兵雙來進攻揚州北面陳金

綬勝保派將弁兵丁攻打西面均於四鼓各帶

布囊並雲梯礮牌等物直趨城下臣琦善復遣

遊擊兵格馳赴蔣王廟一帶會同侍衛德興阿

等於南面分投埋伏防賊向儀徵西竄去後是夜雙來帶兵行至近城坑塹卽令各兵用布囊裝土填塞立時越過直抵城下詎賊匪晝夜礮備聞我兵猝至卽用滾木擗石輒塊灰罐等物紛紛擲下城上槍礮排列甚密我兵於城下仰攻不能得力僅將城上望樓轟燬一座臣陳金綬臣勝保所派官兵攜帶攻城各具攻打西面

亦係同時馳抵城下賊匪面面設防亦難得手
遊擊兵格等探至南門外河干有賊船七隻在
彼停泊係該逆裝載糧石兵丁卽梟水過河將
賊船焚燬而臣等西北兩路攻城之兵自丑至
申竭力攻打時已天晚撤隊回營又據管帶西
安馬隊官兵防堵儀徵縣之副都統常春及知
縣都梁森報稱十二日卯刻有賊船十一隻駛

入儀徵縣沙漫洲地方該副都統卽令該縣督率兵勇馳赴該處見賊船正近江岸卽會同遊擊福明奮勇前進施放槍礮鉤住賊船三隻該逆紛紛落水仍令開槍擊斃賊匪七人槍傷二十餘人擒獲逆匪男婦十人十四日午時據報又有賊船數十隻或駛回江甯或駛至瓜州適遇暴風在老河影江面翻沈賊船兩隻溺斃賊

匪數十人查六合儀徵兩處若再有續派官兵
益資得力

琦善陳金綬勝保又奏言 臣琦善前經札委閒
散旗人書義前往瓜州督同該處紳董辦理團
練茲據該處紳董等稟稱書義督同紳董等購
覓眼線於十一日戌時潛入賊營乘隙縱火已
將瓜州由牖北首賊匪所築土壘木臺概行焚

燬十六日又經該處紳董率領兵勇鄉民萬餘人共往瓜州殺賊奪獲賊船傷賊多名並將越河地方賊築土城拆毀殆盡賊皆登舟亂竄或渡往鎮江或從由牯直上等語該處居民志切同仇深堪嘉尙現仍飭令嚴密防範毋稍鬆懈勝保又奏言臣查各省大礮皆爲賊有足抗我兵非兵力厚集不能圍攻臣等各營除撥調外

僅三千九百餘名統計臣琦善所帶僅六千餘名而揚城四面要隘甚多萬不能分兵布置遇有兵到各省紛紛截留以致進剿兵單反不能剋期奏效臣愚以爲今日之勢兵貴合不貴分任在專不在衆現在各路雖有精兵然各有統屬分而不合不如專一責成以期得力南岸北岸責成統理襄辦各大員將續到各路重兵均

歸統帶隨時調遣所有竄擾處所亦卽責令各員相機剿除則兵以合而見多事以專而能集否則徒分攻剿之力恐曠日持久無濟實功也

奏八

上命軍機大臣傳諭琦善陳金綬勝保曰賊匪踞城固守經琦善等分路進攻各有斬擒雖未得手而逆匪困守城中其勢已極窮蹙正可乘機設法圍攻迅圖

克復揚州團練紳董在瓜州由隔等處焚燒賊船殲
擒賊匪如果始終出力卽著該大臣等酌量保奏以
示獎勵該大臣統領江北諸軍各營官兵均歸節制
鳳陽爲南北咽喉情形危急必當先其所急遏賊北
竄而揚州攻勦亦在喫緊尤須防其乘虛奔突勝保
片稱兵貴合不貴分任在專不在衆現在揚州之兵
勢難再分慧成托明阿奕經等所帶官兵及恩華瑞

昌等所帶後路官兵皆係爲大營應援琦善均應調遣不可稍分彼此前准周天爵截留陝甘續調之兵亦係因滁鳳空虛之故軍情變幻靡常有用之兵自不可置之無用之地惟在該大臣等酌量緩急統籌全局相機辦理

上又命軍機大臣傳諭張亮基崇綸曰現在金陵江面逆匪分股竄擾滁鳳一帶該處兵力尙單所調官兵

一時未能到齊因思湖北按察使江忠源親歷行間戰功屢著前曾諭令馳赴江南幫辦軍務現在該署督等委令順道勦辦廣濟縣匪徒儘此時尙未竣事卽著署提督阿勒經阿接辦該署督等卽飭江忠源統帶兵勇迅速馳赴安徽鳳陽一帶會同周天爵等攻勦該臬司係向榮軍營幫辦並可與向榮聲息相通南北聯爲一氣此股匪徒不難剋期殄滅

同日慧成奏言賊船衝突江浦北岸營盤被燒
復由陡岡直往滁州琦善等請派兵往援臣思
揚州賊匪負嵎日久金陵賊又分股他竄是非
克復揚州我兵不能由分而合清淮高寶爲北
上最要門戶尤須節節派兵以爲後路策應遏
賊上竄之路臣奉調各路官兵計到清江行營
者僅一千餘名前准河南撫臣咨稱西安駐防

兵一千名無須留駐永城臣因滁州一帶告警
遵

旨竭力籌撥卽將此項官兵悉數飭赴皖省此時該處
兵力再加截留調赴東省之陝甘兵四千名已
不爲單至臣統領各兵卽使全數到齊僅敷分
派各隘之用若再另有派撥益形單弱現當前
路防剿喫緊後路未到官兵應請

令經過地方大吏不得就近截留致誤事機

慧成又奏言臣接琦善飛咨以滁州失陷奏催

臣趕緊赴揚接辦攻剿事宜以便該大臣帶兵

徑赴桃源永城迎頭截擊臣現在馳赴下游官

兵僅有千餘揚州負隅之匪尙有數萬目下後

路奉調各兵斷不能剋期而至惟有與護理漕

臣查文經就所有兵勇先派迎截再與陳金綬

勝保協力同心接辦攻剿伏思逆匪狡譎異常
現旣竄陷滁州設從天長斜趨蔣壩則徐州清
浦均應加意設防昨奕經已抵清江臣遠赴下
游距清江在數百里外不能兼顧業將一切機
宜當面告述計將軍托明阿不日亦可趕到卽
令該將軍領兵一千駐紮清江會同奕經楊以
增商酌堵禦其餘兵丁卽由臣催提迅赴揚城

以資攻剿奏八

上命軍機大臣傳諭慧成曰逆匪分股竄擾滁州疊經諭令該署督等派撥北路續到精兵馳往會剿茲據奏稱現將前駐河南永城之西安駐防官兵撥赴皖省該署督奉調各兵難以另行派撥請飭經過地方不得截留自係實情惟滁鳳一帶十分緊要儻稍有疏虞致賊北竄關係尤非淺鮮著慧成仍遵前旨迅

飭托明阿帶兵馳往援應至所稱揚州之兵不應分
撥墮賊奸計朕亦早經計及此時慧成計已馳抵揚
州大營卽著與琦善等面商機宜迅速克復揚城勿
致遲延生變北路各軍前已明降諭旨統歸琦善節
制所有滁鳳一帶分股賊匪應如何撥派官兵前往
剿除該大臣等定已通籌全局酌量派撥也

同日太常寺少卿王茂蔭奏言臣聞現竄滁鳳

之賊不過二三千人在金陵揚州者尙多若統
兵大臣前往堵禦則賊已過清流關地勢平衍
恐賊之在金陵揚州者陸續而來堵禦不盡不
若先攻賊之中路則賊之未過者不能行已過
者必回走似亦致人之法現訪之滁州人據稱
滁州若失自滁州之東進兵而西能徑攻滁城
則善矣或賊多難攻或賊已守城而我兵攻其

清流關之險宜於滁州東郊至沙河集循白米山之麓西南至於清流關此東路循滁北而西攻者也若能由三界集至明光集約會淮北大兵剋期同時並舉淮北官兵由珠龍橋攻關之西北滁東之兵由滁北循山麓以攻關之東南則關可復關復則撲鳳陽之賊與金陵儀揚之賊隔絕不通鳳陽之賊旣易撲滅從此合攻江

甯亦不難矣臣管見所及伏候

聖明採納奏入

上命軍機大臣傳諭琦善陳金綬勝保曰王茂蔭奏現竄滁州鳳陽之賊不過二三千人若由滁州東路進兵由白米山麓西南攻清流關或由珠龍橋攻關之西北滁東之兵攻關之東南則關可復等語現在股匪雖未占踞滁州而形勝之區不可不加意扼守著

琦善等查明所奏各情如有可採卽飭將弁率兵扼據險要趕緊進剿並知照周天爵呂賢基李嘉端督兵夾擊迅殄賊氛如赴皖之兵尙嫌單弱卽著妥籌調遣毋得稍有延緩

上又命軍機大臣傳諭周天爵呂賢基李嘉端曰王茂蔭所奏攻剿清流關情形有無可採著周天爵呂賢基李嘉端悉心體察酌量進攻總期以速爲貴毋任

葛延

同日雷以誠奏言臣奉

命查河常於清浦南北兩岸來往巡閱復差派親信分
路探報十七日戌刻探知逆賊由浦口北竄連
陷滁州臨淮並聞鳳陽有失守之信十八日申
刻又據探報天長六合一帶均有賊匪竄擾黑
龍江官兵千餘並未接仗先行逃避該處鄉民

殺賊多名始行退去且聞揚州頓兵日久統兵大臣擁兵自衛不卽合力進攻以致士氣不揚漸有潰散之勢又聞各路鄉團頗有奮勇殺賊之志每爲諸將所抑時勢緊急萬分非親赴各處密訪不足以得實情臣擬卽日親赴下游各處查明賊情究竟若何揚州何以久未克復該處鄉團果否能衆志成城再行據實具奏臨淮

關已失守徐宿爲入山東河南之總隘應請迅速

飭派重兵前往固守以扼北竄之路奏入

上命軍機大臣傳諭雷以誠曰據奏稱探聞賊匪分竄情形擬親赴下游察看現在揚州雖報有勝仗尙未能卽時克復而黃河口岸頗關緊要該副都御史至揚州察看後仍著迅回清江巡查河岸如有奸細瀾

跡偷渡務卽嚴拏究辦不可少有疏懈

二十四日

戊戌

慧成奏言逆匪狡猾性成往往聲

東擊西目下由浦紛竄之賊確知爲牽掣圍揚
之兵誘我回顧必將由瓜州另聚大股賊衆出
我不意倏忽北來臣現統之兵不滿二千祇可
設法布置後路續調西北各兵尙須飛催赴揚
遲則恐又別生枝節至浦口北竄賊船聞係金

陵分股揚州瓜州京口各賊寂不聞聲安知非
潛蓄異謀別圖不逞臣謂滁鳳之警顯而易見
瓜州之患隱而尤深設中奸謀勢將不可收拾
況揚城逆匪偵探頗速應請

飭令琦善仍駐揚州臣現已行抵高郵距揚甚近俟兵
力稍集兩面奮力攻撲揚城一經克復賊必膽
寒滁鳳之賊亦易剿除然後再爲整師南下之

計奏八

上命軍機大臣傳諭琦善陳金綬勝保慧成曰逆匪詭譎異常聲東擊西是其慣技此次竄擾滁鳳一帶匪徒據慧成奏稱確知爲牽掣圍揚之兵誘我回顧必由瓜州另聚大股北來是其大意總以揚州之兵萬不可分奮力攻撲揚城爲第一要著朕前降諭旨不欲琦善遠離揚州正是此意若揚州一時尙未克復

而滁鳳一帶賊勢益熾徐州爲北方門戶關係亦甚
緊要慧成已帶兵前赴揚州著卽與琦善等迅圖克
復以慰朕望軍情變幻靡常未便顧此失彼該大臣
等務當統籌水陸全局相機擇要分撥調遣尤須偵
探確實慎勿墮賊奸計慧成奏浦口北竄賊船聞係
金陵分股揚州瓜州京口各賊寂不聞聲賊情詭詐
甚屬可疑本日已諭令向榮等確實查探仍著該大

臣等隨時偵探賊蹤防勦兼施勿以圍困窮蹙稍涉
大意

上又命軍機大臣傳諭向榮怡良許乃釗曰據慧成奏
浦口北竄賊船係金陵分股揚州瓜州京口之賊探
無動靜當經諭令琦善等嚴行防範矣向榮等圍攻
金陵賊匪堅拒不出分股潛行渡江滋擾滁鳳一帶
意圖牽掣我軍該大臣等務須隨時偵察南北兩岸

互相援應切勿顧此失彼現在江面匪船來往必須
趕緊設法轟擊水師各船最關緊要楊文定現已拏
問該大臣等務卽派委妥員管帶舟師水陸會合進
剿賊匪聲東擊西是其慣技尤應加意籌防偵探南
北兩岸隨時知照萬不可墮其術中

同日奕經奏言臣於十七日分帶密雲兵五百
名渡河至清江浦安營與河臣楊以增籌商將

所帶兵丁安設礮位防守並已到之綏遠兵二百五十名就近駐紮以爲犄角之勢山西兵四百八十名於十八日到營業與慧成楊以增商令署徐州鎮總兵玉德帶赴徐州合力防堵仍飛飭後路未到之五百餘名就近徑赴徐州以資接應惟王家營爲渡黃北上要隘僅有密雲兵五百名駐守托明阿所帶之兵現祇到有二

百五十名尙未接托明阿到浦確信兵力殊形
單薄賊如由洪澤湖竄至清淮勢必分擾高寶
一帶與揚城賊匪勾連一氣斷絕南北餉道則
剿辦更難得手現計慧成將抵高郵臣當卽飛
咨知照加意防範茲有山東撫臣奏明調赴防
所之五品頂戴前任漕運總督李湘棻到浦該
員曾經帶領兵勇在江北一帶防堵此地情形

極爲熟悉呼應亦靈再有托明阿帶兵到來合力籌防與河臣會同專扼清江一帶臣卽可相度機宜探有何路緊急卽往何路迎擊總期於事有當不敢稍涉拘泥

同日李德奏言臣思賊在揚州東省祇防一路本以王家營爲先而徐州在其次今分擾鳳陽東省宜兼防兩路應以徐州爲先而王家營在

其次且在事諸臣悉力於淮揚惟徐州最要之區並無重兵扼守實屬空虛可慮臣統籌全局亟須權衡輕重絕其闖入之端所有入境之山西三四等起官兵一千餘名已飭署膠州協副將武隆額帶領馳往徐州黃河北岸要隘地方分營駐紮其先後入境之綏遠熱河吉林等起官兵二千四百餘名卽由韓莊改道撥赴徐州

並飛咨新任徐州鎮臣百勝速由重興起程馳赴徐州帶領與武隆額南北兩岸互相策應一面飛咨慧成作速酌派援兵相機進剿固未便因其分擾墮聲東擊西之詭謀尤不可專事一方失移緩就急之至計均奏入

上命軍機大臣傳諭托明阿奕經楊以增李德曰逆匪竄過滁州直至臨淮前已有旨令托明阿馳往攻擊

茲據奕經奏稱托明阿尙無到浦確信不知現在行抵何處著卽飛催帶兵前進如托明阿相離較遠卽著奕經迅帶現到各兵前往截擊刻下徐鳳一帶軍情緊急斷不可稍有遲誤李德奏徐州現無重兵扼守將隨後經過東境之山西三四等起官兵一千餘名交副將武隆額帶領馳往徐州並將綏遠熱河吉林等起兵二千四百餘名由韓莊改道撥赴徐州飛

咨徐州鎮百勝由重興赴徐帶領與武隆額互爲接
應所見甚合機宜仍卽添派委員特令分催以期迅
速並著李德兼程前往宿遷偵探賊蹤相機進剿並
飛催後路官兵源源前進旣可以固東省藩籬又可
爲托明阿等應援至大兵多趨徐郡或該逆又窺伺
清江亦不可不豫爲計及楊以增駐紮該處務須刻
刻嚴防毋稍大意

二十六日庚子陸應穀奏言臣查逆賊攻陷滁州

直撲臨淮甚爲猖獗前准安徽來咨有鳳陽危急之語善祿統帶官兵臣又咨催星馳前進日內必可起程信陽距賊氛較遠歸德陳州所屬並固始等處均與皖省接壤淮甯縣之周家口係屬水路馬頭由臨淮乘船可以直達該處地方緊要當將調赴永城之山西官兵酌派五百

名駐紮周家口巡防固始息縣等處前曾留有
防兵五百名分布要隘惟永城爲豫省東路門
戶距臨淮關僅三百餘里原派防兵通計不過
二千五百餘名歸德亦僅一千九百餘名兵力
單弱不敷布置臣再四籌思應將調赴山東李
德軍營在後未到之陝甘兵二千餘名調赴江
北慧成軍營之陝甘兵一千二百餘名仰懇

聖恩准臣一併截留駐紮永城以備防堵且可以爲安
徽聲援臣現將省城事宜料理完竣卽於二十
四日起程馳赴永城扼要駐紮總當相度緩急
酌量籌辦勿使稍有貽誤奏入

上命軍機大臣傳諭陸應穀曰該撫奏請將陝甘官兵
三千二百名盡數截留未免太多現在皖省軍務十
分喫緊若前路兵單則豫省藩籬亦恐難以自固爲

今之計總宜先其所急催兵接應使皖省北竄之賊
迅就殄滅方不致有誤事機陸應穀現已馳抵永城
仍著隨時體察情形若前路緊急卽迅速撥兵迎剿
切不可稍有拘執善祿已帶兵赴皖著卽催令速進
毋稍遲誤

二十七日

辛丑

琦善陳金綬勝保奏言二十日臣

琦善親督官兵出隊向天甯門一面攻打陳金

綬勝保督率官兵仍攻西門一帶與馮景尼同
時並進槍礮環施計轟塌城垛十餘座斃匪不
少午後已將天甯門旁城身洞穿數穴該逆不
避礮火蠡擁齊至實以厚木架以土石竭力抵
拒並擲滾木擗石甄塊等物我兵竟不能近其
城根是日陳金綬勝保攻城情形相同連日仍
接續攻打以冀速殲羣醜但城堅賊詐防守甚

嚴我兵終未得手必設法趕造攻城器具俾我
兵遮護槍礮不致多傷方能奮力攻入俟臣等
籌畫有成再行續報賊匪勢窮長髮賊多薙髮
乘夜縋出城外意在窺我虛實鋌而走險又據
臣琦善派往瓜州之閒散旗人書義會同瓜州
等處紳士內閣中書鍾淮等於十七日燒燬賊
匪自鎮江運來火藥船隻續又搜獲賊匪十八

名並搜出西瓜礮刀槍各件二十日瓜州虹橋紳士等帶勇先與艇船約會遇風一起卽與賊匪接仗是日適值東風該紳士等焚燬賊船甚多艇船亦如約而至同時打沈船隻無數復放火將金山一帶江面賊船焚燬儘能將江面賊船焚盡使該逆南北中阻卽易爲力奏入

上諭曰揚城指日克復尤不可不防分竄若勢窮竄逸

殲勦猶可得手儘自知難守儘力衝突逆燄飄忽更須加意慎重勿蹈永安之故轍也

上命軍機大臣傳諭琦善陳金綬勝保慧成曰逆匪困守揚城該大臣等現已設法趕造攻具克復自在指日惟據稱賊多薙髮夜縋出城意在窺我虛實賊匪詭譎異常儻於城未攻破之先出我不意儘力衝突而出必致逆燄復張更滋蔓延永安道州卽其前車

之鑒該大臣等務當加意慎重一面飭令各路兵勇合力進攻仍一面擇要層層設伏堵其分竄之路萬不可任賊乘閒奔突又成尾追之勢

同日慧成奏言據琦善咨稱逆匪竄擾滁州該大臣擬繞越迎擊竊思逆匪已竄過滁州則鳳陽宿州一帶卽應救援前已由周天爵等截留陝甘兵四千名復經臣將留駐永城之西安駐

防兵一千名派往應援足資攻勦若分揚州之
兵前往跟追無論賊行已先官兵數日鞭長莫
及即使倍道前進而賊情詭譎難保不隨處設
伏倉卒中其奸計是分撤圍揚之兵無補於鳳
宿且兵經分撤則大營之勢又孤臣駐守北路
帶兵僅千餘名斷不能分援西路設不得力驕
寇損威所關甚巨勝負之機爭於頃刻臣於二

十一日抵邵伯二十二日卽與查文經駐守灣頭此間距揚城僅數里探賊較易進攻亦較近可期得手邵伯仍留淮揚道曹文昭副將李輝連駐守不致疏虞臣思兵數有定賊蹤無定分布不如扼要其力專也尾追不如迎擊其勢驟也馳遠不如防近其機便也奏入

上諭曰所見甚是軍中變幻情形勝敗之機決於頃刻

萬萬不可拘泥

同日周天爵呂賢基奏言據靈璧懷遠等縣稟稱賊匪盤踞臨淮關將已撤之浮橋仍行搭起夜宿南岸日移北岸分赴附近鄉村搶掠民財復據靈璧縣探報二十一日廬鳳道及府縣等官督率鄉勇與逆匪打仗因寡不敵衆以致敗走逆匪仍回臨淮各等語查各路催提大兵除

續到西安馬隊五百名固原兵六百五十名外
其餘均無確信惟招集之勇尙屬可用復經宿
遷縣舉人臧紆青統帶所募壯勇前來赴援臣
等亟令前往攻剿至宿州爲北路屏障必須布
置有方方可爲山東直隸藩籬而由宿達鳳一
由東南之固鎮驛一由正南之蘄縣集兩路均
屬緊要至賊匪渡淮北竄之路若畏避宿州必

由懷遠蒙亳而窺河南歸德之劉家口臣等已
飛飭懷遠縣督飭紳士挑選團勇擇要固守一
面飭派西安馬隊兵由固鎮一路前進直擣臨
淮北岸之賊一面飭派固原兵由蘄縣集一路
前進直抵懷遠鳳陽北岸以便出奇夾攻其各
處義勇均分隨兩路大兵作爲前隊衝鋒奮擊

奏八

上命軍機大臣傳諭周天爵呂賢基李嘉端曰臨淮關
爲南北要地該逆分股竄踞意圖牽掣官軍乘此賊
勢尙不甚大迅速截擊庶不致令蔓延尤須嚴防土
匪勿令與匪黨暗相勾結其由懷遠蒙亳至歸德之
劉家口一路務須擇要固守仍隨時知照陸應穀一
體防範刻下各路官兵計已陸續到齊該侍郎等務
卽督飭將弁兵勇等合力攻剿迅殄賊氛無稍延緩

上又命軍機大臣傳諭李德曰逆匪分踞臨淮皖省情形極爲喫重前據李德奏稱行抵東省各路官兵已催令前赴徐州現在大兵雲集所需軍餉必須寬爲籌備徐州宿遷一帶設立糧臺去山東較近所有各處應解軍餉恐一時不及運到設有貽誤所關非細著李德於藩庫正雜各項無論何款就近撥解務當移緩就急以期源源接濟諒該撫必能權其輕重妥

述辦理也

二十九日癸卯向榮許乃釗奏言臣等於紫金山

進紮大營十八座均已一律移近賊垣官兵聲
勢聯絡卽於十七日夜飭令兵勇伏於城邊火
箭百道射入城中繼以槍礮火罐噴筒一齊拋
擲該逆猝不及防首逆楊秀青等率賊登城見
朝陽門一帶城上之牌刀賊匪疑係官兵開礮

轟斃數百人城中槍礮亂發人聲沸騰達旦始
息十五日午刻鎮江逆匪千餘人手執黃旗從
東南兩門分出肆擾經提督鄧紹良派遊擊朱
占魁長桂各帶兵分中左右三路進攻已革副
都統文藝亦督兵攻打該逆開礮拒敵我兵奮
勇直前衝入賊隊該逆敗退官兵追近城闔殺
斃長髮賊五名擊斃九名生擒一名餘皆敗走

入城堅閉不出總兵和春於十九日乘東北風起知會鄧紹良由陸路接應並會商總兵葉常春副將李德麟等飭令各艇船於二十日黎明起碇進剿和春等督飭各將弁由焦山至甘露寺並鎮城大馬頭一帶賊船紛泊處所開礮轟擊水陸兩路之賊均開礮迎拒我船順風三面攻剿擊壞賊船三四十隻燒燬賊船十餘隻並

宸念

轟斃陸路救應逆匪數十名乘勝追擊至瓜州
口現仍寄碇焦山上游扼賊下竄之路臣等仍
審度形勢防勦兼施以圖攻克堅城用慰

向榮許乃釗又奏言查江甯各城處處可通東
壩惟東南隅朝陽洪武通濟三門爲大營所扼
臣等原擬令總兵音德布帶兵三千駐紮板橋

鳳臺門一帶以遏賊從西南兩面竄往之路惟
因鎮江兵力尙單是以飭令該總兵統帶滇兵
前往與提臣鄧紹良會辦克復事宜迄今板橋
一路尙無官兵分布幸城南四十八社紳董練
勇盤詰極嚴所有長髮逆黨裝扮僧道婦女逸
出者皆被識破伏誅近時該逆又於城中薙髮
扮作難民空手出城其紅黃頭巾旗幟號衣等

物皆買通本地奸民代爲肩挑出城亦被各社
查出立時處死查該犯襪底均有江甯分散東
壩會齊八字作爲暗號臣等又詢之逃出難民
皆言四月初旬城中賊匪揚言有僞西王統帶
逆黨一千二百人陸續出城前赴東壩會齊之
說嗣因先逸之賊爲村民究出殺斃甚多後逸
者逃回城中不少約有六百餘人未敢出城是

該逆竄擾東壩之法詭譎萬端臣向榮已飭委主事劉存厚同都司常瑞帶領廣東兵六百名前往東壩駐紮適有前督臣陸建瀛調營之候補道戚貞來至大營臣許乃釗卽令帶同江蘇舉人馬釗前往高淳率同該處紳士選練丁壯皆用大營兵壯旗幟號衣以壯聲勢一面飛咨督臣怡良在蘇派員添兵前往協同堵剿並又

飛咨浙江撫臣黃宗漢撥兵在湖州交界嚴密防堵臣又札催湖北臬司江忠源迅速來營卽以所帶楚勇一千七百名駐紮鳳臺門益以大營官兵一千數百名聲勢旣壯卽可於城西南隅遙爲聲援奏入

上命軍機大臣傳諭向榮怡良許乃釗彭玉雯曰該大臣等移營進紮紫金山乘夜攻城首逆楊秀青等蒼

黃無措自相轟擊其鎮江水陸兩路亦經鄧紹良督率將弁和春統帶艇船約齊會剿殲擒賊匪多名擊壞及燒燬賊船數十隻是勦辦甚屬得手現在金陵大營十八座偏近城垣所謂蘇州上海杭州等處三千斤及五千斤大礮想亦運到急宜乘勝進攻若先克復省城則鎮城收復勢如破竹江面賊船解散千餘艘若能一律散盡即可斷賊往來並杜截北竄之

路惟賊船散去多隻係往何處是否駛赴上游抑係
分泊北岸其船上有無賊匪潛藏偷越又圖他窺均
須隨時偵探知照皖省江北水陸地方並上游湖北
江西一體嚴防該逆被創窮蹙乘虛衝突恐其潰圍
而出渡江北竄皖省或由東壩直奔蘇常一帶我軍
布置稍疏卽不免又墮奸計該大臣等務宜通籌熟
計總期殄滅妖氛不留餘孽逆首洪秀泉楊秀青等

現在圍困城中其僞西王亦未能逸出該逆等狀貌
形跡必須探訪確實或能購綫內應於克復省城時
全數擒獲不致令其免脫則掃蕩餘匪不難一鼓成
功矣東壩一路經該大臣飭委主事劉存厚同都司
常瑞帶領廣東兵六百名駐紮並委候補道戚貞等
前赴高淳率同紳董練勇嚴行盤詰仍著怡良撥兵
前往協同堵剿毋稍鬆懈逆黨改裝薙髮扮作難民

詭計多端尤須加意巡防近日揚州賊匪圍困技窮
其分股竄擾滁鳳偏近徐州朕恐北路新到官兵未
能深悉賊情已有旨諭令湖北臬司江忠源督帶楚
勇一千七百名由廣濟縣馳赴江北會同截擊徐宿
爲北方門戶不能不先其所急該大臣等全局在胸
必不致顧此失彼

三十日
甲辰 李嘉端奏言逆賊自分擾滁州以後

占踞臨淮關直趨鳳陽該署府裕恭知縣黃元
吉於四月二十一日酉刻在北門外九華山與
賊接仗詎該逆另分一股從小路竄入東門城
內煙火突起九華山與龍興寺兩股賊匪忽向
北門奔去將鄉勇衝散蠡擁闖入府城卽時失
守查鳳郡地當衝要現旣失陷亟須擇要嚴防
以遏該逆紛竄之路臣當飭都司海陞帶兵二

百五十名協守定遠並令總兵玉山知州金光
飭扼守正陽關要口一俟援兵厚集卽當會商
周天爵呂賢基等實力進攻迅圖規復奏入

上命軍機大臣傳諭周天爵呂賢基李嘉端曰前據陸
應穀奏善祿帶領官兵一千九百名於二十日內起
程赴皖托明阿諒亦帶兵起程現復諭令該將軍提
督迅速兼程前進計已到之西安馬隊及固原兵一

千一百五十名並續到之陝甘兵丁當已不少周天爵諒亦由宿州督帶兵勇赴援著李嘉端迅卽會合各路援兵併力進剿攻復郡城琦善所派黑龍江馬隊官兵前赴滁州著該撫飛咨迎提前進前經降旨令江忠源由廣濟帶領練勇赴皖會剿但恐該臬司到皖較遲此時惟有會同現在各兵扼要攻剿勿令該逆更竄他處

上又命軍機大臣傳諭琦善陳金綬勝保慧成曰鳳陽失守該省兵力甚單各路調往官兵一時未能趕到該大臣統制北路諸軍前派武慶開隆阿等帶兵二千赴援現在行抵何處西凌阿等所帶黑龍江馬隊經該大臣飭令追往滁州何以未聞接仗當此萬分喫緊之時豈可聽其逗留著卽嚴飭星速進行會同各路官兵合力勦辦斷不可稍涉延緩致誤事機揚

州疊經獲勝如能及早克復則分擾之股匪其勢自衰該大臣等必能通籌熟計不至顧此失彼也

上又命軍機大臣傳諭托明阿曰鳳陽失守北路情形萬分緊急該將軍計早起程沿途當已探悉著卽倍道前進相機進剿萬勿稍遲善祿由永城帶兵赴援周天爵由宿州前進諒可同時趕到合力進攻務將此股逆匪迅速掃除無任滋蔓

上又命軍機大臣傳諭陸應穀善祿曰鳳陽府城失守
望援甚切善祿所帶之兵諒已早入皖境著卽兼程
馳赴鳳陽迅速進剿萬勿稍遲現在調赴援兵惟托
明阿當已起程周天爵在宿州尙未出境有緩不濟
急之勢著陸應穀將永城現留防兵酌撥趕令前進
爲善祿後路應援其陝甘後起官兵亦不可再行截
留務須先其所急相機調遣皖境安則豫境亦安不

可稍分畛域徒誤事機

上諭內閣曰李嘉端奏鳳陽失守覽奏深堪痛恨逆賊
自滁州臨淮關直趨鳳陽於四月二十一日酉刻府
城失守巡撫李嘉端署藩司奎綬均著革職留任迅
卽督帶調到各路兵勇併力攻剿相機克復所有該
府城內文武官員如何下落卽著迅速查明具奏